



Deporte Local

Patrick Groters selecta door di prensa deportivo na Florida



ORANJESTAD (AAN)--- Nos landador Arubano Patrick Groters a termina su temporada di High School cu hopi éxito. E dos corantnan di Sur Florida, esta Miami Herald y Sun Sentinel a selecta Patrick den nan All Star team pa e aña escolar 2014-2015 pa su resultado. Patrick a termina e temporada cu e tempo mas liher di full Broward County den 500 free, esta 4:31.87. Patrick a logra e tempo aki durante e Campeonato di Florida na unda e a logra gana e medaya di Bronze. E logro aki ta algo fabuloso pa e landador

hoben cu ta apenas den su promer aña di High School, y ya caba a demostra cu pa e proximo 3 aña e lo por ta entre e landadornan mas liher di Florida. Prome cu Patrick a competi na e Campeonato di Florida, Patrick a gana ambos Campeonato di su Distrito y di su Region den 500 yards estilo liber. Pa su segundo evento individual Patrick a landa 50 yrd estilo liber, ganando medaya di Oro den su Distrito, medaya di Plata den region y finalizando na di 7 lugar na e Campeonato di Florida. Patrick a forma parti di dos equipo di estafete campeon na e Campeonato di Distrito, hunto cu su equipo di University School. E estafete di 4x 50 combina a continua, pa sali campeon di región, y a logra yega final y a termina na di 6 lugar pa estado di Florida.

Durante e awards banquet di Patrick su scol Patrick a wordo honra cu 2 awards. Patrick a haya e Most Valuable Player y e Most Improved award pa su equipo. Y apenas algun siman despues e prensa deportivo a saca Patrick como un di e landador cu a destaca den e aña escolar aki.

Patrick awor ta sigi entrena cu Pine Crest Swim Team pa prepara su mes pa representa Aruba na Carifta 2015, lo cual lo tuma lugar na Barbados durante luna di April benidero. Patrick su deseo ta pa logra clasifica pa e weganan PanAmericano 2015 na Toronto. Patrick tin un tempo B caba pero ta desea di landa un Tempo A den su evento principal.